

Programacion varia pa conmemora 30 aña di existencia di Museo Arqueologico durante 2012



Prome Minister di Aruba, sr. Mike Eman hunto cu Fransisco 'Fan' Croes, durante un bishita cu e mandatario a realisa na Museo Arqueologico.

ORANJESTAD - Ayera Museo Arqueologico Aruba a recorda cu 30 aña pasa a ser funda pa e pioneronan manera drs. Egbert Boerstra (q.p.d.) y di Sr. Evelino Fingal. Durante e tres decada aki un grupo di profesional y amigonan

di Museo Arqueologico a sostene y guia e Museo pa awe e ta un di esnan di mas bunita y renombre den nos region, un berdadero orguyo di nos pais.

E conmemoracion di e aniversario aki lo consisti di un

programacion varia durante 2012. E lo inclui exposicionnan temporario, publicacionnan nobo, actividadnan pa publico y eheucion di algun proyecto specifico riba tereno di maneho.

Ayera mainta durante un conferencia di prensa directora di Museo Arqueologico di Aruba, sra. Arminda Frankel-Ruiz, kende ta encarga cu e maneho diario di e museo a duna un relato riba algun di e actividad programa pa e aña venidero.

Un di e proyectonan tin di haber cu e creacion di e Fundacion Museo Arqueologico Nacional, e declaracion di e prome situacionan arqueologico como monumentonan nacional protegi y un excavacion di emergencia na Santa Cruz.

Riba e kalender di actividad, cual lo ser publica na januari 2012, lo tin entre



Sra. Arminda Frankel-Ruiz

otro apertura di un exposicion di e descubrimentonan arkeologico di Boca di Brik y publicacion di resultadonan di esaki. Lo ricibi Dr. Weildler Guerra, antropologo Wayu y Director di e Banco de la Republica na Guajira y Museo lo ta anfitrion di e prome 'think tank' cu 'stakeholders' nan local y internacional pa

planea un exposicion cu lo circula den paisnan di Reino y regio.

Pa 30 aña tanto e publico local como e bishitante internacional por a disfruta di e coleccion y informacion di nos antepasadonan Amerindio den Museo. Ayera Museo Arqueologico Nacional Aruba a presenta e historia tras di esaki cu e complemento di un Timeline riba su website. Ta invita tur persona pa subi e website www.namaruba.org y click riba e link Timeline.

Museo Arqueologico Aruba ta felicita y gradici un y tur cu den transcurso di e añanan na un of otro manera a aporta y a sostene Museo. Tambe nan ta hopi orguyoso di Fransisco 'Fan' Croes cu pa 28 aña a duna ehempel di esaki. 30 Aña di existencia di Museo Arqueologico ta un logro di henter Aruba, segun drs. Frankel-Ruiz. □